

NO. SOALAN: 313

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR S. SUBRAMANIAM
MENTERI KESIHATAN MALAYSIA**

**PERTANYAAN : BUKAN LISAN
DARIPADA : YB TUAN SIVAKUMAR VARATHARAJU NAIDU
TARIKH :
SOALAN : 313**

YB Tuan Sivakumar Varatharaju Naidu minta **MENTERI KESIHATAN** menyatakan benar atau tidak hospital-hospital Kerajaan tidak mencukupi ubat-ubatan untuk diberikan kepada pesakit. Selain daripada itu, apakah kaedah-kaedah lain yang diambil untuk mengawal kos khidmat kesihatan di hospital-hospital Kerajaan.

Tuan Yang di-Pertua,

Kementerian Kesihatan Malaysia telah membelanjakan RM2.107 billion untuk perolehan ubat-ubatan pada tahun 2016. Sehingga 31 Ogos 2017, Kementerian Kesihatan Malaysia (KKM) telah menerima peruntukan ubat sebanyak RM2.028 billion iaitu 96% daripada perbelanjaan yang telah dibuat pada tahun 2016. Sebanyak 82% (RM1.665 billion) daripada peruntukan tersebut telah dibelanjakan sehingga 31 Ogos 2017. KKM akan membuat semakan dari semasa ke semasa berkenaan keperluan peruntukan di semua fasiliti bagi memastikan bekalan ubat-

ubatan sentiasa mencukupi. KKM akan memohon peruntukan tambahan secukupnya sekiranya peruntukan sedia ada tidak mencukupi.

Pada masa yang sama KKM juga melaksanakan langkah-langkah mengoptimumkan dan menjimatkan perbelanjaan bagi mengelakkan pembaziran tanpa menjejaskan kualiti perkhidmatan yang disampaikan. Antara langkah-langkah yang telah dan akan terus dilaksanakan adalah seperti berikut:

1. Memastikan peruntukan ubat diberi keutamaan untuk penyampaian penjagaan kesihatan awam dan sentiasa memantau rapi kedudukan kewangan setiap negeri supaya agihan peruntukan ubat yang diterima selaras dengan keperluan terkini. Perolehan ubat akan dibuat berdasarkan kepada pemantauan berterusan terhadap kedudukan stok dan keperluan semasa.
2. Pemantauan bekalan daripada pembekal dilaksanakan secara berterusan dan langkah-langkah sewajarnya diambil terutama produk-produk yang menghadapi masalah bekalan seperti mendapatkan sumber alternatif dan pengagihan semula stok di antara fasiliti KKM.
3. Pembekalan ubat untuk tempoh satu bulan untuk penyakit kronik seperti diabetes dan hipertensi untuk mengurangkan risiko pembaziran dan kerosakan ubat dalam simpanan pesakit.
4. Pesakit digalakkan membawa baki ubat setiap kali datang ke hospital atau klinik kesihatan sama ada untuk mendapatkan bekalan ubat susulan ataupun dimasukkan ke wad. Amalan ini

dapat mengelakkan pembaziran serta kesilapan pengubatan kerana ubat-ubatan yang dibekalkan sentiasa dipantau dan pembekalan ubat adalah mengikut keperluan pesakit sahaja.

5. Mengutamakan perolehan dan penggunaan ubat-ubatan generik yang lebih murah dan ekonomik tetapi dapat memberi kesan terapeutik yang sama dengan ubat-ubatan innovator. Ini dapat mengoptimalkan perbelanjaan ubat-ubatan dan memastikan bekalan ubat-ubatan pada paras yang mencukupi.

Tuan Yang di-Pertua,

Kementerian Kesihatan sentiasa mengambil inisiatif dalam mencapai penjimatan yang optimum tanpa menjejaskan mutu perkhidmatan kesihatan. Antaranya adalah dengan melaksanakan perolehan secara pukal dan berpusat bagi peralatan-peralatan pakai buang (konsumabel), *plug-and-play* dan sebagainya. Dengan itu, penjimatan yang diperolehi dapat disalurkan semula kepada perkhidmatan kesihatan yang lain.

Bagi perolehan peralatan konsumabel, terdapat satu program iaitu *Approved Product Purchase List (APPL)* yang melibatkan kontrak pusat bagi perolehan tersebut di antara Kerajaan dan syarikat pembekal. Ia dilaksanakan setiap 2-3 tahun dan sepanjang tempoh kontrak tersebut, harga bagi peralatan konsumabel adalah tetap dan diselaraskan bagi kesemua PTJ seluruh negara. Harga yang ditawarkan juga adalah berpatutan mengambil kira pembelian dengan jumlah kuantiti yang besar (*Economy of Scale*).

Bagi perolehan peralatan-peralatan *plug-and-play* pula, perolehan secara berpusat (tender terbuka) telah mula dilaksanakan bermula pada tahun 2015. Melalui kaedah ini, harga yang ditawarkan adalah lebih kompetitif berbanding pembelian secara berasingan di peringkat PTJ. Bagi tahun 2015 dan 2016, Kementerian telah berjaya melakukan penjimatan sebanyak RM32 juta bagi pembelian 3,334 buah peralatan perubatan *plug-and-play* tersebut.